



Ken ta Shon Papa de Windt

ORANJESTAD (AAN)--- Shon Papa a nace dia 21 augustus 1944. El a lanta den e bario di Socotoro. For di chikito ela cuminsa hunga baseball pa e team di Little League "Arrow", dirigi pa e legendario Luis Swaen. (d.f.m.). Despues ela bai hunga den junior League pa e team di "Hilton Shoes" di "Chipi Chipi (d.f.m.)" Despues di a hunga baseball den little league ela cuminsa hunga futbol den junioren di Aruba Juniors y a gana diferente campeonato. E tempo ey, e juniorennan di Dakota tabata nan contrincante mas serio.

Shon Papa a hunga den tur e klassenan di futbol pa finalmente e yega hoofd-klasse pa Aruba Juniors. Ela hunga hunto cu hungadornan manera entre otro Osvaldo Lolli, Ruben Phillips, def. Watty Vos, Luisito Vingal, Fon Paula, Gochi Brion. Despues ela fungi como refree di futbol judando e deporte.

Tambe Shon Papa e hunga basketball pa Aruba Juniors. Prome den junioren, despues den B-klasse

y por ultimo den A-klasse. Ela representa Aruba contra equiponan di Suriname manera "Chinese Little Devils", "Ahrend" y "Sibilo Brothers".

Cu 15 anja Shon Papa a cuminsa hunga softball pa e team di "Baltimore Colts" bao direccion di e conocido Robert "Ro" Agunbero". Despues Baltimore Colts a cambia number I a bira Aruba Juniors bao maneho di Luis Swaen. Aruba Juniors despues a cambia number y nan a bira "Aldo Travel Bureau" cu a wordo gesponsor pa Dolfi Oduber y despues pa Don Horacio Oduber. Algo chistoso tabata cu Horacio mes tabata hunga pa Casa Haime.

Despues cu Aldo a stop di existi, Shon Papa a bai hunga pa Casa Haime pa Cabo Quilotte d.f.m. E tempo aya, Casa Haime ta tin e record di mas campeonato gana na Aruba. Tambe nan a gana Copa Antillano di softball.

Como hungador di softball, Shon Papa semper tabata pitcher. Shon Papa a hunga baseball pa Marlboro

tanto de... A-klasse como dooble A (aunque no mes bon cu soft' ill). Marlboro tin un record den baseball, no imposibel, pero dificil si pa kibra.

Na 1964 Shon Papa a drea a Cuerpo Policial na Corsow. Ela bini Aruba na 1965 pa un periodo cortico I despues ela bolbe Corsow caminda ela sigi progresa cu su studio. Durante cu e tabata na Corsow Shon Papa a hunga softball pa Caballeros, basketball pa Olympic I futbol pa Jong Holland. Despues ela pasa over pa e team di Sithoc, dirigi pa Shon Mi Krips (d.f.m.) Despues di e disturbionan na mei 1969 ela wordo traslada pa Islan ariba caminda ela casa y despues a haya traslado pa Aruba.

Den Bush League Shon Papa a hunga softball pa White Label Sluggers, Extra

Aruba Sluggers I por ultimo Aruba Juniors Vets, promer como Seguros Aponte y ultimo temponan como Aruba Juniors L.G./General Store y awor aki como Aruba Juniors L.G. Pa motibo di salud (8 operacion na e dos pianan y tambe na nek y lomba) Shon Papa mester a retira di tur deporte den e sentido cu e no ta practika nan mas riba tereno, pero si ainda e ta yuda como coach di Aruba Juniors y como miembro di directiva di Aruba Juniors. Tambe Shon Papa ta miembro honorario di Sportvereniging Aruba Juniors.

Como seleccionado Shon Papa a defende nos bandera den e Campeonatoan Centro-Americano y del Caribe tanto den Judo como Softball. Tambe ela hunga den weganan PanAmericano na 1979 na Puerto Rico y

1991 na Cuba. Cu softball ela bishita Venezuela, Colombia, Puerto Rico, Costa Rica, Ecuador, Panama, Santo Domingo, Corsow y Boneiro.

Shon Papa a traha casi 41 anja na Cuerpo Policial y awor e ta gosa di su pensioen.

Despues di morto di su casa, 7 anja pasa, e ta zorg pa su yiunan y nietonan. E tin 4 yiu, 3 mucha muher y un mucha homber (Peppie de Windt) Te mes ta hasi tur cos na cas, laba panja, strika, cushina hasi cas limpi y de bes en cuando hiba y busca e nietonan for di skol y den week-end: SOFTBALL.

Pa tur e logronan grandi ariba menciona directiva di Federacion Liga Mayor di Softball di Aruba ta dedica e campeonato oficial di anja 2013 na Pedro "Shon Papa" de Windt.